



SUATEA



COMUNICÁU DE PRENSA - EDUCACIÓN

El retayu promovíu pol gobiernu asturianu PSOE-IX afecta a los más desfavorecíos.

Los dirixentes d'IX enchípanse de que gracias a so pactu col PSOE van tener que pagar los que más ganen y amás les sos conseyeríes van salir beneficiaes. Sicasí paecen pasar percima los movimientos del gobiernu tocantes a los retayos de los servicios públicos, nesti casu n'educación.

El cursu pasáu yá se sufrió un retayu na plantiya d'orientación siendo los más perxudicaos l'alumnáu con necesidaes educatives y el conxuntu del profesoráu, anaguaño amás de caltener esti retayu, ayeri amenorgóse la dotación de profesoráu que trabayaba nes aules de somorgamientu llingüísticu, nin más nin menos qu'a la metá. Esti profesoráu ye l'encargáu d'atender al alumnáu inmigrante de recién incorporación que namás conocen y usen les sos llingües maternes.

Al nuesu gobiernu esti tipu de profesoráu que trabaya col alumnáu más desfavoreció paez-y prescindible, namás ye importante cuando se viende a la prensa como una novedá pero dempués, pela parte de tras y de punteres, esaníciense les places.

Toes estes midíes son namás l'anunciu de futuros y drásticos retayos nes condiciones de trabayu del profesoráu, que van castigar en mayor midida al colectivu más débil, el profesoráu interín, que puede llegar a perder, en munchos casos, el puestu de trabayu.

Esti drásticu y lesivu retayu de profesoráu va afectar necesariamente y de manera grave a la calidá de la enseñanza pública, y enforma tarrecemos que sía un pasu dau col envís de ser definitivu, como una espresión más, quiciabes la más grave y ardigosa conocida hasta agora, del progresivu deterioru de tolo público dientro de la ofensiva xeneral de mercantilización y privatización del estáu del bienestar a la que venimos asistiendo. Qué llueñe queden agora aquellos discursos alrodiu del calter primordial de la educación como inversión de futuru, al ser la responsable de formar a los ciudadanos del mañana como principal activu d'una sociedá en constante evolución.

Uviéu, 06/07/2010

El Secretariáu d'Asturies de SUATEA